

# REGOLAMENT PE CONCESSION DI CONTRIBÛTS PES INIZIATIVIS CULTURÂLS

## Art. 1

### Cjamp di aplicazion

1 Chest regolament al dissipline lis modalitâts di concession dai contribûts finalizâts al davuelziment di iniziativis di promozion des ativitâts culturâls e, in detai, par chescj setôrs di intervent:

- L.R. n. 68 dai 08/09/1981 “Intervents regjonâi pal disvilup e pe difusion des ativitâts culturâls”,
- tit. II “Ativitâts musicâls, teatrâls, cinematografichis e audiovisivis”;
- tit. III “Ativitâts umanistichis, sientifichis, artistichis e des sciencis sociâls”;
- tit. VI “Ativitâts di tutele e di valorizazion des lenghis e des culturis locâls”
- L.R. n. 15 dal 01/06/1987 “Intervents regjonâi pe promozion di une culture di pâs e di cooperazion fra i popui”;
- L.R. n. 31 dai 11/12/1989 “Intervents a sosten de ativitât des universitâts de tierce etât”.

## Art. 2

### Sogjets beneficiaris e tipologjiis di intervent

1 A puedin beneficiâ dal contribût chescj sogjets, daûr di ce che a previodin lis leçs regjonâls di riferiment:

L.R. n. 68 dai 08/09/1981 tit. II:

- i ents locâi di bessôi o associâts che si valin di struturis lôr o di altris sogjets, che a realizin iniziativis di musiche e di danzie, iniziativis teatrâls o di culture cinematografiche e audiovisive;
- i istitûts di formazion musicâl, di studi, di ricercje, di sperimentazion e di documentazion tal cjamp de musiche e de danzie;
- lis istituzions lirichis e conciertistichis, i ents, lis associazions e lis cooperativis che no àn fins di vuadagn, che a promovin spetacui di musiche e/o di danzie, strumentâi e polifonics, stagjons conciertistichis, rassegnis, fiestis, concors e seminaris;
- i ents, lis associazions, lis cooperativis e lis companiis privadis che, cence fins di vuadagn, a promovin ativitâts teatrâls;
- i istitûts di studi, di ricercje, di sperimentazion e di documentazion teatrâl, cinematografiche e audiovisive;
- lis associazions che a promovin o a slargjin iniziativis tal setôr cinematografic e audiovisîf, lis associazions dai cines *d’essai* e i cineclubs che a promovin il cine tant che moment di promozion culturâl;

L.R. n. 68 dai 08/09/1981 tit. III:

- i ents locâi di bessôi o associâts, i ents publics, i ents e lis istituzions privadis che a àn fins soledut culturâi e che a lavorin cence fin di vuadagn tal cjamp de produzion, de documentazion e de difusion des dissiplinis umanistichis, artistichis e che a rivuardin lis sciencis sociâls;

L.R. n. 68 dai 08/09/1981 tit. VI:

- i ents locâi di bessôi o associâts, i ents publics, lis scuclis, i ents privâts e lis associazions culturâls cence fins di vuadagn che a lavorin par realizâ ativitâts di tutele e di valorizazion des lenghis e des culturis locâls;

L.R. n. 15 dai 01/06/1987:

- i ents locâi, i ents publics, lis universitâts, lis scuêlis di ogni ordin e grât, lis associazions che a lavorin te scuêle, lis istituzions culturâls, lis associazions che a lavorin pe promoziun de culture de pâs, de solidarietât e de cooperazion fra i popui;

L.R. n. 31 dai 11/12/1989:

- lis universitâts de tierce etât, no impuarte ce non che a àn, de region Friûl Vignesie Julie, afiliadis a lis associazions nazionâls des universitâts de tierce etât o des associazions des universitâts popolârs de tierce etât e de libare etât che a organizin ativitâts culturâls a pro dai anzians.

### **Art. 3**

#### **Concession dai contribûts**

1. Lis domandis di concession dai contribûts che si fevele ta chest regolament a àn di rivâi a la Aministrazion Provinciâl dentri dai 31 di Zenâr di ogni an completis di:

- a) At constitutîf e Statût o lôr inzornament se al è stât fat, dome se la Aministrazion Provinciâl no ju à za,
- b) dome pai Ents Publics: at formâl dal orghin deliberant che al autorize a mandâ la domande,
- c) relazion ilustrative des iniziativis in program,
- d) preventîf des spesis in detai;
- e) relazion in struc de ativitât davuelte tal esercizi prin di chel di riferiment e cont consuntîf,
- f) composizion dai orghins sociâi se a son gambiamenti rispjet al document che la Aministrazion Provinciâl e à za.

2 Tal câs che la documentazion no sedi complete, la Provincie i 'ndi domandarà lis integrazions te comunicazion di inviament dal procediment aministratîf. Il tiermin dal procediment al reste sospindût fin che no vegnin presentâts i ats integratîfs demandâts. Se no rivin dentri di 30 dîs dopo de domande, il procediment si siere cun esit negatîf.

### **Art. 4**

#### **Direzions, criteris e motîfs di escluson**

1 I contribûts a vegnin assegnâts daûr di chescj criteris:

- aes iniziativis di interès soledut provinciâl, in detai:
- aes manifestazions e lis iniziativis dulà che i participants a rivin dal teritori de provincie o di fûr dal comun,
- aes manifestazions e lis iniziativis ordenariis, che a ricorin plui voltis dentri de provincie;
- aes iniziativis di interès soledut provinciâl inmaneadis in colaborazion cu la Aministrazion Provinciâl o realizadis des Aministrazions Comunâls, dai ents e des istituzions che a àn sede o che a organizin manifestazions tal teritori de Provincie di Pordenon;
- aes iniziativis che a cjapin dentri un biel numar di personis e che a vegnin de colaborazion fra ents, associazions e istituzions;
- aes istituzions, associazions e ai ents che a àn mostrade une cierte continuitât tal impen e une cualitât costante tes iniziativis;
- aes ativitâts di produzion culturâl pitost che di pure riproduzion/trasferiment di iniziativis che si fasin in altris puecj;
- aes iniziativis che a prudelin la difusion des ativitâts culturâls e dai circuits culturâls tes comunitâts residents in areis gjeografichis periferichis;
- aes iniziativis che a prudelin l'inseriment a plen de Provincie tune rêt plui grande di scambis cu lis Provinciis dongje e in gjenar cui Paîs Europeans;

- aes iniziativis e aes manifestazions che a promovin la difusion de culture te scuele e sul lavôr;
  - aes iniziativis di ricercje, di studi e di documentazion inmaneadis a supuart diret des ativitâts di produzion e di documentazion;
  - aes iniziativis a àn fins educatîfs ben clârs;
  - aes iniziativis proponudis dai Comuns e des Associazions tal teritori di montagne.
- La concession dai contribûts e va dût di une classificazion des iniziativis in trê categoriis, secont la impuartance e la valence che la Comission Provinciâl competent ur da, cun chescj criteris:
- Fasse A – iniziativis impuartantis a nivel provinciâl e un grum significativis a nivel culturâl (plui di € 2.500,00 di contribût);
  - Fasse B – iniziativis di spessôr minôr rispjet a la fasse superiôr, ancje rispjet a la spese che si pues ameti a contribût (fra € 500,00 e € 2.500,00 di contribût);
  - Fasse C – iniziativis di pocje spese e di significât culturâl minôr (fin a € 500,00 di contribût);
- a son di preferî, se no son motîfs di interès particulâr pe Provincie (convenzion o coedizion dal event) chês manifestazions che no gjoldin za di contribûts regjonâi significatîfs, par vie di leçs setoriâls.

Par ce che i inten in detai a la L.R. 15/87 “Intervents pe promozion di une culture di pâs e di cooperazion fra i popui”, la Aministrazion e prudelarà soredut:

- lis iniziativis che a proponin claris finalitâts educativis su la pâs, su la solidarietât e su la cognossince fra i popui e su la integrazion, in specialitât sul teme de imigrazion regolâr dai extracomunitariis e su la difusion di une culture di tolerance;
- lis iniziativis di zimulament des comunitâts locâls e des scuelis cun altris realtâts culturâls forestis.

2. A restin fûr de assegnazion dai contribûts lis iniziativis e lis manifestazions che:

- no àn motivazions culturâls validis;
- a àn caratar plui che altri ricreatîf;
- a tindin a sodisfâ interès dome di part de popolazion.

Altris motîfs di escluson a vegnin fûr cuant che:

- la sede juridiche e la sede prime des ativitâts de Associazion a son logadis tun teritori di fûr de provincie. Alore la Aministrazion e valutarà dome chês ativitâts che la Associazion e inmanee tal teritori provinciâl;
- l’ent che al fâs domande no davuelç une ativitât specifiche di almancul un an;
- i ents a ricevin contribûts ordenaris anuâi che i assegne la Regjon.

3 La semplice presentazion de domande no da dirit a vê i incentîfs, nancje se a son i recuisîts sogjetîfs e ogjetîfs previodûts.

## **Art. 5**

### **Istrutoriis e valutazion des domandis, assegnazion dal contribût**

1 A vegnin ametudis a la istrutorie lis domandis di contribût che a rivin dentri dai tiermins e completis di duçj i elements di documentazion previodûts di chest regolament.

2 Par ognidune des domandis dulà che si ricognossin i recuisîts formâi di amissibilitât la Aministrazion e va a individuâ lis vôs di spese che a puedin jessi ametudis a contribût, cun riferiment a ce che e previôt la normative di setôr, e e determine i impuarts relatîfs.

3 Ai sogjets destinataris dal contribût, insiemit a la comunicazion dal impuart assegnât, la Aministrazion ur domandarà di presentâ une declarazion di acetazion dal impuart e un preventîf di spese in detai de stesse some dal contribût par viodi cemût che al vignarà doprât. I sogjets destinataris a puedin spindi lis somis assegnadis ancje par comprâ struments e implants che ur coventin par davuelzi i lôr programs di ativitâts culturâls, dentri dal limit massim dal 25% dal contribût assegnât.

**Art. 6**  
**Modalitât di rindicontazion**

1 I beneficiaris dal contribût cun nature juridiche di ents/istitûts privâts, e lis associazions cence fins di vuadagn a àn di presentâ, no plui tart dai 31 di Zenâr dal an dopo, la liste analitiche de documentazion a justifiche des spesis sostignudis, di butâ jù daûr di ce che al proviôt l'art. 43, de L.R. n.7 dal 2000.

2 Se il beneficiari al è un sogjet public alore al à di presentâ, no plui tart da 31 di Zenâr dal an dopo, une declarazion cu la firme dal legâl rapresentant dal ent o dal funzionari responsabil dal procediment che e provi che la ativitât che e à vuadagnât il contribût si è davuelte tal rispiet des disposizions normativis che a disciplinin la materie e des condizions, se a 'ndi son, stabilidis tal at di concession, daûr di ce che al proviôt l'art. 42 de L.R. 7/2000.

3 I beneficiaris dal contribût a varan di presentâ, cul rindicont economic, i materiâi promoziônai produsûts pes iniziativis realizadis. Cheste documentazion e varà di ripuartâ la scrite "realizât cul contribût/sosten de Provincie di Pordenon".

**Art. 7**  
**Revoche dal contribût**

1 Il contribût al ven revocât o, se al è stât za dât, al va tornât indaûr cuant che il beneficiari nol rive adore a rindicontâ il contribût ricevût.

2 Ducj i sogjets beneficiaris a puedin jessi sometûts a ispezion par verificâ se la documentazion e ateste che i contribûts erogâts a son stâts spindûts.

3 Se e mancje la rindicontazion dal contribût dal an prin, la sovenzion e ven revocade in automatic e il sogjet cjatât in difiet nol pues jessi ametût a altris sovenzions tal cors dal esercizi seguitîf.

**Art. 8**  
**Acuardis pes iniziativis culturâls**

1 La Aministrazion Provinciâl e pues promovi, di besole o in coedizion cun altris sogjets, la realizazion di iniziativis che e pense che a sedin di grant interès pe programazion culturâl dal Ent. La realizazion des iniziativis le regolin acuardis di pueste che a disciplinin i rapuarts cu la Aministrazion Provinciâl, a cjatin fûr cuâi che a son i obietîfs dai interventi, a specificchin i compits di organizazion e di gjestion, a viodin trops bêçs che e à di meti la Provincie. La stipule di chescj acuardis si fasile tal rispiet dai regolaments provinciâi e des normis di setôr.

**Art. 9**  
**Jentrade in vore**

1 Chest regolament al jentre in vore a partî de date che e devente esecutive la deliberazion di aprovazion buride fûr dal Consei Provinciâl.

2 Par ce che achì nol è proviodût franc e net, a valin lis disposizions di leç in materie.